

三通考輯要

第二函
五十一冊

欽定續文獻通考輯要卷九

山陰湯壽潛疊先恭輯

選舉考臣等謹按宋之選舉首重進士制科其次則三學選補至於教官武舉童子等試以及遺逸奏薦貴戚公卿任子親屬與遠州流外諸選雖委曲瑣細咸有品式故得人稱盛遼金元以武開國崇尚弓馬遼景宗道宗亦行貢試金太宗世宗屢闢科場元初以科舉選士至仁宗延祐間始斟酌舊制行之當時裒然舉首應上所求者彬彬輩出矣明制科目爲上卿相皆由此出學校則儲才以應科目者也其徑由學校通籍者亦科目之亞也外此則雜流矣然進士舉貢雜流三途並用雖有畸重無偏廢也茲續仍仿馬例

舉士

宋理宗寶慶二年以士子弊竇日滋左諫議大夫朱端常陳防戢之策時舉人之弊凡五曰傳義曰換卷曰易號曰卷子出外曰謄錄滅裂於是用端常言命試院申嚴門禁入試日一切不許傳遞士人暮夜投卷令封彌官躬親封鑰卷匱士人親書簿歷投匱中俟舉人盡出院然後啟封分類抄上卽付謄錄所明旦申逐場名數於御史臺檢核其撰號法上一字許同下一字各異以杜訛易謄錄人選擇書手充不許代名其考官容情任意者許臺諫風聞彈奏至嘉熙二年又以類試封彌作弊不一命前期於兩浙轉運司臨安府選見投吏胥共三十人差近上一名部轄入院十名專管詩賦餘分管諸經各隨所管號於引試之夕分尋試卷各置簿封彌別差一吏將號置歷發過謄錄所書寫其簿歷封彌官收掌不經吏手不許謄錄人干預以革其弊

紹定元年復知舉參詳差臺諫御史舊制 初省試奉勅差知貢舉一員同知二員內差臺諫官一員參詳官若干員內差監察御史一員俾會聚考校微寓彈壓糾察之意甯宗初韓侂胄用事將鈐制士人遂於三知舉外別差同知一員以諫官爲之專董試事不復干預考校參詳官亦不差察官於是約束峻切氣燄薰灼嘉泰間更名監試製造簿歷嚴立程限其失愈甚至是復舊制三知舉內差一臺諫十參詳內差一御史至端平初侍御史李鳴復等又言臺諫充知舉參詳既留心考校不能檢梏姦弊乞仍舊差臺諫爲監試從之

二年飭考官明示詞賦題意各房分經考校 臣僚言詞賦命題不明致士子上請煩亂經義不分房別考致士子多悖經旨因有是命至三年臣僚又請學校塲屋並禁斷章截句破壞義理及春秋經越年牽合其程文本古注用先儒說者取之穿鑿撰說者黜落

定四月上旬廷試至期更不移展 向廷試惟蜀士到杭最遲每展日以待會有言蜀士嗜利多引商貨押船致留滯關津者故爲定期至淳祐九年省試用三月廷試用八月遠方之士往往滯留逆旅十二年乃詔來年省試仍用二月一日廷試用四月十五日以前度宗咸淳十年成都已失廷試擬五月五日蜀士至者絕少展至末旬又因覆試特奏名至部猶少展作六月七日復以隆暑命立秋後擇日

四年勅漕臣嚴選考官仍令有司量展揭封之期嚴治士子虛僞之罪 時塲屋士子日盛卷軸如山有司不能編題迫於日限去取不能皆當蓋士人既以本名納卷或別爲名或易以字一人納二三卷不禁挾書又許

吳燭浙聞諸郡又間日引試中有一日之暇甚至次日午方出於是經義可作二三道詩賦可成五六篇幸皆中選往往以兄弟承之或轉售同族姦詐百端乃命諸郡關防於投卷之初責鄉鄰覈實嚴治虛僞之罪縱容之罰其弊稍息

復四川類試遣官之制 四川類試其事雖隸制司而監試考官共十員惟大院別監司主文各一員從朝命餘聽制司選差自安丙爲四川制置大使差四員之外權委成都帥守臨期從近取具是歲始仍舊朝命四員餘從制司分選

詔避親人與漕舉及待補國子生到省者同試於別院 舊制避親舉人與命官鎖廳同試自紹熙三年分場各試其額太窄寒士憚之朝士之被差爲大院考官者恐多妨其親亦不願差寒士於鄉舉千百舉一之中得預秋薦以數千里之遠辛勤赴省而省闕差官乃當相避遂有隱身匿名不認親戚以求免者有憤懣憂沮狼狽邸者至是言者謂除大院收試外以漕舉及待補國子生到省者與避親人同試於別院亦將不下數百人數既多其額目寬寒士可不怨其親戚朝士可不憚於被差從之至嘉熙元年罷諸牒試凡郎官以上監司守倅之門客及姑姨同宗之子弟與游士之不便於歸鄉者並混同試於轉運司各從所寓縣給據赴司納卷一如鄉舉之法家狀各書本貫不問其所從來而定其名曰寓試以四十名爲額滿五千人則臨時取旨增放二年言者又以類申門客滿里子孫仍前漕試六十人取一較之他處雖甚優而取無定額士有疑心就試者

少宜令額寬而試者衆塗一而取之精遂依前例放行寓試亦以四十名爲定額仍前待補

端平元年詔士子發解三十年凡五到省許就特科以四分取一置前四等

申定宗子鎖廳應舉解試之制 宗子試法始於神宗熙甯十年高宗紹興初行在宗室試國子監者有官鎖廳七取其三無官應舉七取其四無官祖免親取應文理通爲合格不限數而外任主官觀獄廟試於轉運司者取放之額同進士

嘉熙元年罷牒試仍申嚴冒牒國子之禁 寶慶間禮部侍郎曹彥約奏曰科舉之弊莫甚於牒試而牒試之弊莫甚於作僞蓋解額有廣狹士子有衆寡廣而寡者固已安其分則狹而衆者必思所以爲之計朝廷以承平日久士子日盛設爲牒試之法寬其進取之門末節細故未暇深察於是改鄉里以就他人之貴改三族以認他人之親甚者改其父祖改其姓氏若得若失尙未可知而欺君之跡已昭昭不可掩矣今國子監牒試其弊尙少臣不知其本末未敢據議惟是漕試之弊積習既久士大夫互相欺詐恬不爲怪壞士子心術莫甚於此時舉摘一二尤者而懲戒之於事無補律以科舉之法無一可者則改而更張之不可緩也好事者深知其不便求其說而不得欲增解額則難立限制欲均解額則侵及他郡欲廢漕額以益諸郡不特舊額不等極費區處而所部之親戚故舊有決不可不避者變舊法以起爭端終不可久無已則有一焉在內有職事官朝廷之所選用也在外有監司帥守朝廷之所責任也大郡之有通判小郡之有簽判轉運司之有主管文學諸路

之有川廣福建又遠地之多士子處也與其詐僞避親而使之冒試孰若嚴其保任而使之牒試隨其官品分其差等若監司帥守可舉十五人則大郡可舉十人中下郡可舉七八人通判可舉五人主管文字與簽判可舉三人川廣福建不在此位者不過一二人職事官之牒門客者當如其舊其以川廣福建牒者即官以上不得過下郡之數寺監丞以下不得過通判之數明載公牘參以法令如是行之不增發解不拂人情而解額之狹處與士子之衆處受其利如前日也但前之爲法不許其保任而容其詐僞後之爲法不容其詐僞而許其保任其利害相去何如哉

初置紹興安吉試院 時以士子數多於禮部及臨安轉運司兩試院外紹興安吉各置一院從朝廷差官前詣同日引試分各路士人就試同在京不許見燭

二年命省試下第及游學人並就臨安府給據赴兩浙轉運司混試待補國子生

淳祐元年復別院引試之制 臣僚言既復諸路漕試合國子試兩項科舉及免舉人不下千數宜復撥漕舉

實舉同避親人並就別院引試使大院無卷冗之患小院無額容之弊從之三年仍令試別院者復歸大院

二年詔軍功補授人願就鄉舉者聽

三年申定試法科之制 先是寧宗嘉定十一年五月申嚴試法官七等之制至是以試法科者皆取撰成見義挾入試場令刑部措置關防其考試則選差大理丞正歷任中外有聲望者不許止用新科評事未經作縣

之人逮其試中仍做省試中書覆試之法質以疑獄觀其識筆明允始與差除

四年增點檢雷同官 謹按宋時省闈體例士人卷子先經點檢官批定分數然後參詳官審定其當否上之知舉而決其去取高下則一卷凡經數人之手而雷同之不辨其疏玩亦太甚矣

六年詔曰昨令三學各舉經明行修氣節之士而諸生合辭控免秉義甚高其令在籍諸生並起來年省試一次臨安府學長諭亦如之以稱搜羅之意

十二年廣南西路言所部二十五郡科選於春官者僅一二蓋山林質樸不能與中土士子同工請援兩淮荆襄例別考從之

寶祐二年定發解給歷之法 監察御史陳大方言士風日薄文場多弊乞將發解士人初請舉者從所司給帖赴省別給一歷如命官印紙之法批書發解之年及本名年貫保官姓名執赴禮部又批赴省之年長貳印署赴監試者同如將來免解免省到殿批書亦如之如無歷則不收試候出官日赴吏部繳納換給印紙應合免解免省人亦從先發解處照此給歷如省殿中選將元歷發下御史臺考察以憑注闕給告士子得歷可爲據證有司因歷可加稽驗目前僞冒之人可不却而自遁遂自明年始行之

其三年二月詔省試中選士人覆試於御史臺爲定制 舊制鄉貢監補省試皆有覆試其法令宰執出題不許都司干預仍日輪臺諫一員籠外監試至是并士人中選者亦覆之

五年正月詔三省詳議取士之法 詔略曰我國家因唐之舊進士一科得人爲盛三百年間所以保乂王家垂休億載厥功懋哉弊久蠹滋近年尤甚非無佳士穎出由此其選然窮經學古者或病於詞華植德礪行者難究其蘊奧高才大器者往往局於纖悉繩墨之末是以官甚冗而才愈乏家殊俗而風益漓至於冒國法以苟營假儒冠而挾策俚言亂雅勸說趨時使習之者反賊其良而取之者莫任其咎人情至此咸欲變通嘗聞先朝名臣奏議其論取士之法非一惟程顥程頤深知治道酌古通今綱目詳明用意純切令三省詳議參酌其可行者條具以聞務於科舉無大更張以安士心而於進士舉之外所以崇尚經術考察德行選用材能之道立爲一代之典陶成四方之風庶幾豐芑之仁垂之萬世顧不美哉

庶宗咸淳七年十二月初置士籍 丞相賈似道欲制東南士心令御史陳伯大請置士簡開具姓名年甲三代妻室令鄉鄰結勘於科舉條例無礙方許納卷

九年以諸州郡鄉貢終場人衆而原額少命自今年爲始視終場人數多寡每二百名取放一名

遼聖宗統和六年詔開貢舉 葉隆禮契丹國志曰程文分兩科一曰詩賦一曰經義每三歲輒一試進士貢院以二寸紙書及第者姓名於上給之號爲喜帖明日舉案而出樂作及門擊鼓十二面以法雷震聖宗時止以詞賦法律取士詞賦爲正科法律爲雜科

七年三月宋進士挈家來歸者十七人命有司考其中第者補國子官餘授縣主簿尉

興宗重熙十九年六月詔醫卜屠販奴隸及悖父母或犯事逃亡者不得舉進士
道宗大安五年三月詔析津大定二府精選舉人以聞仍詔諭學者當窮經明道
天祚帝乾統五年十一月禁商賈之家不得應進士舉

聖宗統和六年賜及第一人 謹按遼科目始見於統和而室昉傳稱會同初登進士第則進士之來遼矣
開泰元年詔裴元感邢祥知禮部貢舉七月進士康文昭張素臣郎元達等坐論知貢舉私曲皆杖而徒之
太平九年十一月皇城進士張人紀趙睦等二十七人入朝試以詩賦皆賜第

興宗重熙五年十月御元和殿放進士馮立等四十九人 時以日射三十六熊賦幸燕詩試進士於廷賜馮
立趙徽四十九人進士第以立爲右補闕徽以下皆爲太子中舍賜緋衣銀魚遂大宴宰臣張儉請幸禮部貢
院歡飲至暮而罷賜物有差 謹案傳言趙徽中重熙五年甲科王觀中重熙七年乙科則遼時科第亦有甲
乙之分也 又按遼之進士皆漢人契丹人無舉進士之條傳載重熙中耶律富魯舉進士第帝怒其父庶箴
擅令子就科目有違國制鞭之二百然天祚紀載耶律達實舉天慶五年進士而紀於五年又不云放進士蓋
史之缺漏多矣

金取士之制有詞賦經義策論律科經童其試詞賦經義策論中選者謂之進士律科經童中選者曰舉人凡
諸進士舉人由鄉至府由府至省及殿廷凡四試皆中選則官之至廷試五被黜則賜之第謂之恩例又有特

命及第者謂之特恩 詞賦進士試賦詩策論各一道經義進士試所治一經義論策各一道 策論進士選女直人之科也始大定四年世宗命頒行女直大小字所譯經每穆昆選二人習之尋欲興女直字學校明安穆昆內多擇良家子爲生諸路至三千人九年選異等者得餘人薦於京師廩給之命溫特赫吉達教以古書作詩策後復試得圖克坦鎰以下三十餘人十一年始議行策選之制至十三年始定每場策一道以五百字以上咸免鄉試府試止赴會試御試且詔京師設女直國子學諸路設女直府學擬以新進士充教授以教士民子弟之願學者俟行之久學者衆則同漢進士例三年一試二十年以女直學大振詔今後以策詩賦三場策用女直大字詩用小字程試之期皆依漢進士例二十八年以女直進士惟試以策行之既久人能預備命於經內出題加試以論章宗承安二年勅策論進士限丁習學遂定制內外官員諸局分承應人武衛軍若明安穆昆女直及諸色人戶止一丁者不許應試兩丁者許一人四丁二人六丁以上止許三人三次終場不在驗丁之限三年定制女直人以年四十五以五試進士舉於府試十日前委佐貳官善射者試射其制以六十步立垛去射者十五步對立兩竿相去二十步去地二丈以繩橫約之弓不限強弱不計中否以張弓巧便發箭迅正者爲熟閑與十箭中兩箭出繩下至垛者爲中選餘路委提刑司在都委監察體究如當赴會試御試者大興府佐貳官試驗三舉終場者免之 律科進士又稱爲諸科其法以律令內出題府試十五題每五人取一人其制始見於海陵正隆元年世宗大定二十二年定制會試每場十五題二場共通三十六條以上文

理優擬斷當用字切者爲中選臨時約取之無定數二十九年章宗卽位有司言律科止知讀律不知教化之原可使通治論語孟子以涵養其氣度遂令自今舉後復於論語孟子內試小義一道府會試別作一日引試命經義試官出題與本科通考定之

太宗天會五年八月以河北河東初降職員多闕詔南北各因其素所習之業取士號爲南北選

熙宗天眷元年五月詔南北選各以經義詞賦兩科取士

海陵天德二年始增殿試之制三年併南北選爲一罷經義策試兩科專試詞賦

正隆元年命以五經三史正文內出題三年一舉

世宗大定四年勅宰臣進士文優則取勿限人數

十八年諭宰相文士有偶中魁選不問操履輒授翰苑之職無行之士往往敗露自今榜首先訪察其鄉行可

取則授以應奉否則從常調十九年詔通場併答時務策

二十八年復經義科申定試期鄉試之期以三月二十日府試之期若策論進士則以八月二十日試策間

三日試詩詞賦進士則以二十五日試賦及詩又間三日試策論經義進士又間詞賦後三日試經義又三日

試策次律科次經童每場皆間三日試之會試則策論進士以正月二十日試策皆以次間三日同前御試則

以三月二十日策論進士試策二十三日試詩論二十五日詞賦進士試賦詩論而經義進士亦以是日試經

義二十七日乃試策論若試日遇雨雪則俟晴日御試唱名後試策則稟奏宏詞則作二日程試舊制試女直進士在再試漢進士後是年以後設經義科更定是制

章宗明昌元年詔免鄉試其府試以五人取一人會試依世宗制中格者取毋限數凡試以六經十七史孝經論語孟子及荀揚老子內出題皆於題下註其本傳其舉人程文所用故事亦自註出處至六年又命題註本傳不得過五十字經義進士御試第二場試論日添試策一道

二年敕官或職至五品者直赴御試

承安四年詔詞賦經義科御試同日各試本業依舊分立甲次詞賦第一名爲狀元經義魁次之恩例與詞賦第二人同餘分爲兩甲中下人並在詞賦之下先是一科有兩狀元至是改其制

泰和元年詔進士試策日自時務策外更以疑難經旨相參爲問使發聖賢之微旨古今之事變著爲令詔放良人不得應諸科舉其子孫則許之先是勅樂人不得舉進士而奴免爲良者則許之尙書省奏舊稱樂工謂配隸諸色及倡優之家今少府監工匠太常大樂署樂工皆民也而不得與試前代令諸選人身及祖父曾經免爲良者雖在官不得居清賈及臨民今反許應舉誠玷清論帝然之故有是詔

定搜檢之制是年省臣奏搜檢之際雖當嚴切然至於解髮租衣索及耳鼻則過甚矣豈待士之禮哉故大定二十九年嘗依前故事使就沐浴官制衣爲之更之既可防濫且不虧禮帝從其說命行之

二年定會試取士數大定二十五年以前取不過五百人二十八年復經義科至五百八十六人章宗承安二年至九百二十五人宣宗貞祐初取八百有奇中丞把古喇言仍從泰和之例

宣宗貞祐三年四月定諸進士登第授階制 策論詞賦進士第一甲第一人特選奉直大夫第二人以下經義第一人並儒林郎第二甲以下徵事郎同進士從事郎經童將仕郎 金史選舉志曰金承遼後凡事皆欲軼遼世故進士科目兼採唐宋之法而增損之其及第出身視前代特重而法亦密焉若夫以策論進士取其國人而用女直字爲文斯蓋就其所長以收其用又欲行其國字使人通習而不廢耳終金之代科目得人爲盛諸宮護衛及省臺部譯史令史通事仕進皆列於正班斯則唐宋以來之所無者宣宗南渡仕進之歧既廣僥倖之俗益熾軍伍勞効雜置令錄門廕右職迭居朝著科舉取士亦復泛濫而金治衰矣

海陵正隆二年鄒子聰以天德進士第三復就是年御試得第一 李世弼金登科記序略曰金天會改元始設科舉有詞賦有經義有同進士有同三傳有同學究凡五等詞賦初以經傳子史內出題次又令逐年改一經亦許註內出題以詩書易禮春秋爲次循遼舊也天眷三年於析津府試天德三年始親試於南京貞元二年遷都於燕自後止試於析津府正隆二年以五經三史正文內出題明昌二年改令五經子史內出題仍與本傳此詞賦之大略也經義初試於眞定府所放號七十二賢榜後及蔚州析津令易書詩禮春秋專治一經內出題蓋循宋舊天德三年罷此經義之大略也天眷三年令大河以南別開舉場謂之南選貞元二年遷都

遂合南北試於燕正隆二年令每二年一開科立定程限月日更不擇日府試初分六路次九路後十路此月
日路分格也天德二年詔舉人鄉府省御四試中第明昌三年罷去御試止三試中第府試五人取一依大定
例不過五百人後以舉人漸多會試四人取一得者常不下八九百人御試取奏旨此場數人數格也天眷二
年析津放第於廣陽門西一僧寺唱名選都後於宣陽門唱名後爲定例此唱名之格也明昌初五舉終場人
直赴御試不中者別作恩榜賜同進士出身會元御試不中者榜末安插府元被黜者許來舉直赴都又與祐
三年終場人年五十以上者卽行該恩此該恩之格也大定三年孟宗獻四元登第特授奉直大夫第二第三
人授儒林郎餘皆從仕郎後不爲例明昌間以及第者多第一甲取五六人狀元授十一官第二人授九官餘
皆授三官此授官之法也進士第一任丞簿軍防判第二在縣令此除授之格也 謹按金進士之制特重若
海陵時孫梅以貴妃厝古定格家奴賜進士及第則濫甚矣

元太宗九年八月命試諸路儒士中選者除本貫議事官得四千三十人 考試以論及經義詞賦分爲三科
作三日程專治一科能兼者聽但以不失文義爲中選復其賦役令與各處長官同署公事時得東平楊英等
若干人多一時名士當世或以爲非便復中止

世祖至元四年九月翰林學士承旨王鶚等請行貢舉法從之命中書左三部與翰林學士議立程式 成宗
時翰林學士王惲奏曰貢舉之法宜生選教官定所明經史爲所習科目以州郡大小限其生徒揀俊秀無玷

汚者充員數以生徒員數限歲貢人數期以歲月使盡修習之道然後州郡官察行者學極其精當貢於禮部
經試經義作一場史試議論作一場廷試策兼用經史斷以己意以明時務如是則士無不通之經不習之史
仁宗皇慶二年十二月詔行科舉定條制 中書省臣奏取士之法經學實修己治人之道詞賦乃摘章繪句
之學自隋唐以來專尚詞賦故士習浮華臣等擬將律賦省題詩小義皆不用專立德行明經科以此取士庶
可得人帝然之乃下詔曰三代以來取士各有科目要其本末舉人宜以德行為首試義則以經術為先詞章
次之浮華過實朕所不取其以皇慶三年八月天下郡縣興其賢者能者充賦有司次年二月會試京師中選
者朕將親策焉 科場每歲一次開試舉人從本貫官司於諸色戶內推舉年及二十五以上鄉黨稱其孝悌
信義經明行修之士結狀保舉以禮敦遣咨諸路府其或徇私濫舉并應舉而不舉者監察御史肅政廉訪司
體察究治者試程式蒙古色目人第一場經問五條大學論語孟子中庸內設問用朱氏章句集註其義理精
明文詞典雅者為中選第二場策一道以時務出題限五百字以上漢人南人第一場明經經疑二問大學論
語孟子中庸內出題並用朱氏章句集註復以己意結之限三百字以上經義一道各治一經詩以朱氏為主
尚書蔡氏為主周易以程氏朱氏為主已上三經兼用古註疏春秋用三傳及胡氏傳禮記用古註疏限五百
字以上不拘格律第二場古賦詔誥章表內科一道古賦詔誥用古體章表四六參用古體第三場策一道經
史時務內出題不矜浮藻惟務直述限一千字以上 會試將禮部韻略外餘並不許懷挾文字差搜檢

懷挾官一員每舉人一名差軍一名看守提點擺掠試院差廉幹官一員度地安置席舍務令隔遠仍自試官入院後監押外門鄉試會試糊封謄錄對讀官下吏人於各該衙門從便差設凡犯御名廟諱及文理紕繆塗注乙五十字以上者不考舉人與考試官有五服內親應迴避而不自陳者殿一舉邵遠平續刊簡錄曰臧晉叔云元以詞曲取士設十二科其說無據自至元八年設國學出策題試問所對精通者爲中選皇慶二年制科舉皆用經書時務爲題並無詞曲一項此明證也

延祐二年三月始開科分蒙古色目人爲右榜漢人南人爲左榜仍用趙孟頫元明善所議貢試法

四月賜進士恩榮宴於翰林院賜會試下第人教授等官

順帝至元元年十一月詔罷科舉初徹爾特穆爾濟江浙行省平章政事會行科舉釋請試官供張甚盛心頗不平及入中書首議罷之參政許有壬力爭曰科舉若罷天下人才缺望丞相巴延曰舉子多以職敗又有假蒙古色目名者有壬曰科舉未行臺中職罰無算豈盡出於舉子巴延又曰科舉取人實妨選法有壬曰科舉取士豈不愈於通事知印等出身者今通事知印等天下凡三千餘名自四月至九月受宣者七十三人而科舉一歲僅三十餘人太師試思之科舉選法果相妨耶巴延心然其言而議已定不可中輟遂罷之二年六月禮部侍郎呼喇台請復科舉取士之制不聽六年十二月復科舉取士制仍稍變程式

至正十九年三月詔定科舉流寓人名額

二十六年正月命增燕南河南山東陝西河東等處會試舉人額進士及第以下遞升官一級

至正十二年三月詔省院臺不用南人似有偏負宜依世祖時用人之法南人有才學者皆令用之自是累科

南方之進士始有爲御史爲憲司官爲尙書者矣

原三十四

明以科目取士試士之法專取四子書及易書詩春秋禮記命題其文略仿宋經義然代古人語氣爲之禮用排偶謂之八股通謂之制義三年大比以諸生試之直省曰鄉試中式者爲舉人次年以舉人試之京師曰會試中式者天子親策於廷曰廷試亦曰殿試分一二三甲以爲名第之次一甲止三人曰狀元榜眼探花賜進士及第二甲若干人賜進士出身三甲若干人賜同進士出身子午卯酉年鄉試辰戌丑未年會試鄉試以八月會試以二月皆初九日爲第一場又三日爲第二場又三日爲第三場廷試以三月朔鄉試直隸於京府各省於布政司會試於禮部舉子則國子生及府州縣學生員之學成者儒士之未仕者官之未入流者皆由有司申舉性情敦厚文行可稱者應之狀元授修撰榜眼探花授編修二三甲選用庶吉士者皆爲翰林官其他或授給事御史主事書行人評士太常國子博士或授府推官知州知縣等官舉人貢生不第入監而選者或授小京職或授府佐及州縣正官或授教職

太祖吳元年三月定文武科取士之法

洪武三年五月詔曰漢唐及宋取士各有定制然但貴文學而不求德藝之全前元待士甚優而權豪勢要每